



Sin viadi cun la Viafier retica tras l'Engiadina.

MAD

# Da Scuol a Puntraschigna

## Cun viafier, gaud e musica

DA GUIU SOBIELA-CAANITZ

■ **Suenter l'avertura da la lingia dal Vereina (1999) ha la Viafier retica (VR) meglirà sia spierta per passagers tranter Puntraschigna (2060 olmas) e Scuol (strusch 4700 olmas suenter las fusiuns da 2015).** L'urari da tact è norma bunamain absoluta. Ils autpledaders dals trens derasan adina puspè messadis per puter u vallader. Il num da staziun «Ftan» manava savens a confusiuns cun l'auto da posta; ussa stat cleramain il toponim «Ftan Baraigla». Il tschancun Puntraschigna–Samedan è integrà en las cursas per e da Scuol; quai facilitescha las colliaziuns da e per Puschlav e Tiraun. Igl è tuttina donn ch'ins ha abolì ils chaustaziuns da plis lieus; ma la VR n'è betg la culpa per la digren da populaziun en vitgs pli pitschens, e la situaziun en chaussa è mendra sin las lingias dal Partenz e da la Val d'Alvra nua ch'ins ha serrà pliras staziuns. Anc pendenta è mo la dumonda da la staziun da Lavin. Da l'autra vart ha l'introducziun dal «Büga» simplifitgà ils viadis cun tren ed auto da posta en il Grischun ed ordaifer, fin a Damal, Danuder e Landeck.

### Prestaziuns culturalas

A Puntraschigna sa cruschian tschancuns da la VR che mainan a San Murezzan, a Tiraun ed a Samedan e Scuol; a Samedan pon ins midar per la Val d'Alvra e Cuira. La staziun da Puntraschigna ha in kiosk da gasettas propi internaziunal. Mo in exempel: Tgi che s'interessa per l'actuala

crisis politica en Spagna dapli che per l'olimpiada na chatta quasi nagut en gasettas svizras; ma a la staziun da Puntraschigna, sco dal rest a quella da Scuol, po el cumprar «El País», la meglra gasetta spagnola dal di. Sisum la part veglia da Puntraschigna pon ins admirar in monument medieval che merita l'ascensiu: «La veglia baselgia parochiala ed odierna baselgia da sepultura (consecrada a s. Maria) cun sias impurtantas picturas muralas datescha dal temp postromanic» (1). Là han lieu mintga stad concerts da musica classica; il davos da 2016 è stà ils 9 d'avust. Ma la prestaziun culturala la pli remartgabla da Puntraschigna per ils giasts da stad ha lieu mintga damaun, da zercladur a settember, en il gaud da Tais, ubain, en cas d'aura pauc favuraivla, en il center da congress u en la baselgia refurmada. I sa tracta da concerts da la Camerata Pontresina. Directur *Jan Steiner* punctuescha: «La cumbinaziun da musica classica, cuolms e natira carmala in vast auditori en il gaud inspiratur mintga stad dapi passa tschient onns» (2).

### Fin da stad 2016

I vala la paina d'ir a dudir in da quels concerts, ina damaun da las 11.00 a las 12.00; ina tabla sin via di sch'el ha lieu en il gaud, en la baselgia u en il center cultural. Il concert da cumià sa splega ils 18 da settember, dumengia da Rogaziun federala. Ses punct culminant vegn segir ad esser il «Gassenhauer», trio per clavazin da Ludwig van Beethoven (1770–1827).

«The Fiddler on the Roof» («Il violinist sin il tetg») da Jerry Bock (1928–2010) vegn a far endament «Anatevka» da Mariano Tschuor il 1998 a Laax. Ma mintgatant surlascha la camerata la chamonna dal gaud a trais musicists talentads ed experimentads: Il trio ospitant furmà da Gyula Petendi (cello), Beata Danilewska (clavazin) e Cornelia Messerli-Ott (gia). Lez Trio Petendi suna questa stad a Puntraschigna anc trais gievgias, ils 25 d'avust, l'emprim ed ils 8 da settember. Ins na po betg recumandar avunda ils concerts da quella gruppa. I suonda sco exempel il program dals 25 d'avust:

- «Donauwellen» («Valurile Dunarii»), valzer dal cumponist rumen da derivanza serba Isosif Ivanovici (\* Timisoara/Temesvár 1845 – † Bucuresti 1902);
- «Tocs romantics» d'Antonín Dvořák (1841–1904);
- «Trio per clavazin» da Wolfgang Amadeus Mozart (1756–1791);
- ina «Mélodie» da Piotr Ilitsch Tschai-covski (1840–1893);
- «Otoño Porteño» («Atun a Buenos Aires») d'Astor Piazzolla (1921–1992);
- «suitta or da l'operetta «Viktoria und ihr Husar» da Paul Abraham (1892–1960).

Bun divertiment a Puntraschigna!

1. Ottavio Clavuot en: *Stiftung Historisches Lexikon der Schweiz* (ed.), *Lexicon Istoric Retic. Tom 2. Cuira* (Desertina, ISBN 978-3-85637-391-7) 2012, p. 213, *chavazzin «Puntraschigna»*.  
2. *Pontresina Tourist Information 2016, Via Maistra 135, 7504 Puntraschigna, www.pontresina.ch*